

Bosna i Hercegovina
Federacija Bosne i Hercegovine
Kanton Sarajevo
JU Treća gimnazija
Vijeće roditelja školske 2023/24. godine

Sarajevo, 18. 10. 2023. godine

ZAPISNIK

Prve vanredne sjednice Vijeća roditelja

Prva vanredna sjednica Vijeća roditelja održana je 18.10.2023. godine u školskoj biblioteci Treće gimnazije sa početkom u 18.00 sati.

Sjednici je prisustvovalo 15 članova Vijeća roditelja (od neophodnih 13 koliko iznosi quorum neophodan za odlučivanje prema članu 16. Poslovnika o radu Vijeća roditelja), direktorica škole gđa. Amra Čolić kao i njena zamjenica gđa. Meliha Salihović. Odsutno je bilo 9 članova Vijeća roditelja od kojih je 6 najavilo svoj izostanak (g. Samir Pleho I6, g. Feris Bešić II6, g. Nedžad Sudić III2, gđa. Snježana Brkić III3, gđa. Admira Salić-Čano III6 i g. Rifat Fetić IV3), g. Tihomir Veselinović (I3) je naknadno opravdao svoj neplanirani izostanak radi bolesti, a 2 člana (gđa. Armina Puzić IV2 i gđa. Maida Agić IV4) su nenajavljeno odsustvovala.

Dnevni red sjednice najavljen je putem mail-a i to:

1. Razmatranje finansijske podrške roditelja projektima učenika JU Treća gimnazija na molbu Udruženja „Alumni Treće gimnazije Sarajevo“
2. Tekuća pitanja

Dnevni red je jednoglasno usvojen.

Ad/1

(Razmatranje finansijske podrške roditelja projektima učenika JU Treća gimnazija na molbu Udruženja „Alumni Treće gimnazije Sarajevo“)

Gđa. Aida Aganović, predsjednica Vijeća roditelja (II1), dala je uvodne informacije i podsjetila prisutne na smjernicu Ministarstva za odgoj i obrazovanje Kantona Sarajevo kojom se ukida mogućnost da škole stiču vlastite prihode po osnovu participacije roditelja učenika u troškovima školovanja. Time su vannastavni projekti koje realizuje i po kojima je prepoznatljiva Treća gimnazija onemogućeni. Vijeće roditelja sada razmatra mogućnost finansijske potpore roditelja učenika Treće gimnazije, na dobrovoljnoj osnovi, tim projektima putem saradnje sa udruženjem bivših učenika i simpatizera Treće gimnazije „Alumni Treće gimnazije Sarajevo“ koje je također izrazilo spremnost za saradnju.

Naglasila je da se finansijskom potporom udruženju „Alumni Treće gimnazije Sarajevo“ ne vrši finansiranje ni škole ni udruženja već isključivo učeničkih projekata koje vodi škola budući da bi se sakupljeni prihodi vodili na posebnom računu pomenutog udruženja čiji bi nadzor provodili predstavnici Vijeća roditelja.

Uvodnim izlaganjem gđe. Aide Aganović otvorena je diskusija na ovu temu.

G. Izet Turković (IV5) je rekao da ne vidi spornim ovakav pristup Vijeća roditelja u kontekstu člana 159. Zakona o srednjem obrazovanju KS uz uslov da vannastavni projekti učenika i škole nisu obuhvaćeni finansiranjem iskazanim u članu 170. Zakona o srednjem obrazovanju KS koji definiše segmente finansiranja srednjih škola od strane nadležnih institucija Kantona Sarajevo.

G. Adnan Hajrulahović (II2) je načelno podržao ideju Vijeća roditelja uz sugestiju da se u diskusijama toliko ne potencira izvrsnost Treće gimnazije kao škole nad drugim školama, jer i druge škole su dobre. Nisu ocjene učenika jedini kriterij izvrsnosti škole naglasio je.

Gđa. Velida Begović (IV1) u svojoj diskusiji je podržala pristup Vijeća roditelja da podrži vannastavne projekte škole ali uz prijedlog korekcije troškova dostavljenog mail-om. U tom smislu je naglasila, u više navrata, važnost zakonskog nastupa Vijeća roditelja.

Direktorica škole gđa. Amra Čolić je naglasila da pomenuti Zakon o srednjem obrazovanju KS ne predviđa neku posebnu finansijsku potporu vannastavnim aktivnostima učenika i škole. Projektima poput ovih u Trećoj gimnaziji, između ostalog, afirmiše se kreativnost, solidarnost i socijabilnost učenika. Promoviše se njihov izlazak iz trendova pasivizacije i podstiče aktivno učešće u društvenim tokovima što je od izuzetne važnosti. Također je naglasila da u školi postoje različite situacije koje zahtjevaju djelovanje škole u zaštiti svoje efikasnosti a koje nisu finansijski podržane od nadležnih institucija Kantona Sarajevo (npr. omogućavanje brzog pristupa relevantnim informacijama škole putem internet stranice). Navela je, između ostalog, da su npr. laptopi koji se koriste u kabinetu odjeljenja IT smjera donacija Norveške.

G. Mirza Terzo (IV6) je podržao ideju Vijeća roditelja koja omogućuje kontinuitet aktivnosti škole, jedne od najboljih, iz prethodnih godina naglasivši da smatra da u tom smislu nema zakonskih prepreka ali da Vijeće roditelja svakako treba imati uvid i nadzor nad informacijama ovakve saradnje.

Gđa. Dalida Karabdić (I2) jer također podržala ideju Vijeća roditelja uz prijedlog definisanja memoranduma saradnje Treće gimnazije i udruženja „Alumni Treće gimnazije Sarajevo“.

G. Mirza Hulusić (I5) je naglasio da Vijeće roditelja pomenutu ideju potpore projektima škole treba proslijediti kao informaciju roditeljima učenika odjeljenja. Smatra da se Vijeće roditelja ne bi trebalo previše involvirati u kontrolu saradnje sa udruženjem jer pomenuta saradnja podrazumjeva povjerenje. Smatra da je dovoljno da udruženje „Alumni Treće gimnazije Sarajevo“ pošalje izvještaj Vijeću roditelja. Ovakav pristup Vijeća roditelja po njemu nije sporan shodno članu 159. stav 3b. Zakona o srednjem obrazovanju KS.

Gđa. Indira Čećo-Hidić (I1) je izjavila da je, neformalno, razgovarala sa roditeljima svoga odjeljenja te da u osnovi podržava ideju Vijeća roditelja.

Gđa. Amra Škapur (III4) načelno podržava ideju Vijeća roditelja ali i mišljenje g. Adnana Hajrulahovića (II2) u kontekstu pretjeranog potenciranja izvrsnosti škole. Naglasila je da prijedlog Vijeća roditelja ne treba definisati kao odluku već kao informaciju koja se prosljeđuje roditeljima odjeljenja ističući važnost zakonskog nastupa Vijeća roditelja.

Gđa. Aida Aganović, predsjednica Vijeća roditelja (II1), složila se sa idejom potpisivanja memoranduma ili protokola saradnje sa udruženjem „Alumni Treće gimnazije Sarajevo“ koji bi formalizovao odnos Vijeća roditelja sa pomenutim udruženjem.

Gđa. Almira Muhović (III5) je naglasila da (prije definisanja detalja saradnje Vijeća roditelja sa pomenutim udruženjem) ideju Vijeća roditelja o finansijskoj potpori vannastavnim projektima škole putem pomenutog udruženja treba dobro proanalizirati i zapitati se, kada se sve sagleda, da li Vijeće roditelja radi stvar utemeljenu na zakonu obzirom na smjernicu Ministarstva kojom se školama ukida mogućnost sticanja prihoda po osnovu participacije roditelja učenika u troškovima školovanja.

Diskusije članova Vijeća roditelja, kao i predsjednice Vijeća roditelja gđe. Aide Aganović, naglasile su smisao da se inicijativom Vijeća roditelja ne finansira ni škola ni udruženje već pravo vannastavni projekti naše djece pod pokroviteljstvom škole.

Nakon diskusije pristupilo se glasanju. Za inicijativu finansijske podrške roditelja učenika Treće gimnazije, na dobrovoljnoj osnovi, projektima učenika i škole putem udruženja „Alumni Treće gimnazije Sarajevo“ glasalo je svih 15 prisutnih članova Vijeća roditelja.

Vijeće roditelja je saglasno da se u tom smislu sačini memorandum (ili protokol) saradnje između Vijeća roditelja i udruženja „Alumni Treće gimnazije Sarajevo“. Udruženje bi predstavnicima Vijeća roditelja, za koje su izabrani gđa. Aida Aganović, predsjednica Vijeća roditelja (II1) i gđa. Maksida Ibrahimović (I4), dostavljalo izvještaj o prikupljenim sredstvima i realiziranim projektima u toku školske godine.

Ad/2

(Tekuća Pitanja)

G. Adnan Hajrulahović (II2) je pomenuo sada već prevaziđeni problem svog djeteta (i njega kao roditelja) u komunikaciji sa profesoricom historije Treće gimnazije kao i sa školom u kontekstu mogućnosti odsustvovanja učenika škole koji su perspektivni sportisti ili reprezentativci sa nastave. Smatra da komunikacija nije bila prihvatljiva i da škola nije adekvatno reagovala.

Direktorica škole gđa. Amra Čolić je konstatovala da je bila upoznata sa problemom koji je naveo g. Adnan Hajrulahović (II2) te da je, po njenom mišljenju, tada sve urađeno u skladu sa Protokolom komunikacije i saradnje roditelja sa školom.

Naglasila je da ukoliko segmenti problema još postoje mogu se dodatno iskomunicirati budući da škola među svojim učenicima redovno ima i perspektivne i neperspektivne sportiste i da ima razrađen modus postupanja u takvim situacijama.

Prva vanredna sjednica Vijeća roditelja završena je u 19.40 sati.

Zapisnik Prve vanredne sjednice sastavio
g. Izet Turković, sekretar Vijeća roditelja



Zapisnik ovjerila
gđa. Aida Aganović, predsjednica Vijeća roditelja


